

20  
22

ISLA ONLINE  
Noticia Transparente di Gobierno

Dialuna 24 October 2022

Email: IslaOnline@gobierno.aw Tel: 528-4952



Gabinete Wever-Croes //



**OCTOBER**  
LUNA DI CONSCIENTISACION DI  
**CANCER NA PECHO**

ISLA  
ONLINE

Noticia di Gobierno





# **PROME MINISTER A BISHITA E 10 SCOLNAN CU MAS MUCHA A PARTICIPA NA E COMPETENCIA DI PINTAMENTO PA CONSCIENTISACION DI LEY DI CACHO**

**Scolnan a ricibi certificado**



En conexion cu 'Dia di Bestia' 4 di october, tabatin un e concurso di pinta y kleur "Ley Di Cacho" 2022, Prome Minister Evelyn Wever-Croes a haci un recorrido na e Top 10 scolnan di cantidad di mucha cu a participa na e competencia di pinta y kleur, pa conscientisacion di ley di cacho. Prome Minister a entrega un certificado di participacion na e 10 scolnan aki.

E concurso tabata pa scolnan preparatorio y scolnan basico, caminda cu tur alumno por a pinta algo cu tin di haber cu Ley di Cacho. Ademas a pidi e scolnan pa papia cu e muchanan y conscientisanan di locual e ley ta contene.

E Top 10 scolnan a base di cantidad di participacion ta : Rayo di Solo Kleuterschool na San Nicolas, Paulusschool na San Nicolas, Colegio Sagrado Curason na Savaneta, Maria School na Sta Cruz, School Souer Juliette na Ayo, Colegio Pastoor Kranwinkel na Paradera, Mon Plaisir Basis na Oranjestad, Imelda Kleuterschool Oranjestad, Colegio Bon Bini Oranjestad



y a termina na St. Anna School na Noord.

Prome Minister Wever - Croes a expresa cu e ta un honor pa a bishita e scolnan y scucha tur locual e muchanan tocante Ley di Cacho a traves di e competencia di pintamento. E muchanan a siña tocante cuido di cacho y e importancia pa cachonan ta mara (na 'leash') ora cu sali cu nan pafo di cura pa su proteccion.

Anteriormente ya a reparti premio na esnan cu a gana cu pintura di mas bunita y awo Prome Minister a entrega certificado na e top 10 scolnan cu mas mucha a participa. E scol cu tabatin mas participante ta St. Anna School cu 139 participante. Por ultimo Premier - Wever - Croes a gradici e scolnan pa nan participacion y ta desea cu ta sigui mira participacion di scolnan na otro competencianan den futuro pa sigui aumenta conscientisacion cerca nos muchanan.



Continuacion **PROME MINISTER A BISHITA E 10 SCOLNAN CU MAS MUCHA....**







## Minister Ursell Arends ta enfoca riba control social: **FIXI TA CONECTA BUREAU CITY INSPECTOR CU COMUNIDAD**

Minister Ursell Arends conhuntamente cu Bureau City Inspector (BCI), cual ta resorta bou di Ministerio di Naturalesa a anuncia e aplicacion nobo cu ta yama Fixi.

“Nos a señala cu Aruba no por warda mas pa cu introduccion di un maneho di desperdicio, y ceramento di Dump di Parkietenbos”, asina e mandatario a menciona na inicio di e conferencia di prensa. “Tin un necesidad desespera pa kick-start solucionnan, mientras ta busca manera pa mehora procesonan of crea algun nobo na caminda”.



**Gobierno ta prepara pa atende cu e reto di desperdicio pero e lucha no ta di gobierno solamente.** Durante e proceso di redireccion di taira e tabata cla, tin algun cu ta cla pa resisti cualkier cambio positivo, den cualkier forma posibel. Gobierno ta anticipa resistencia, pero tambe nos ta premira cu un grupo mas grandi den comunidad lo kier contribui na e cambionan y ta dispuesto pa yuda cu e control social y pa stimula comportacion responsabel. FIXI ta pa e grupo aki.

FIXI ta un aplicacion hopi facil pa uza, e ta “user-friendly” y ta empodera ciudadanonan cu mira algo cu ta robes pa nan por raporta esaki y tin e confiansa cu e raportahe ta yega na e instancia concerni.

Proceso di raporta ta facil:

**1)** Observa un situacion **2)** Saca potret **3)** Skirbi raportahe cortico di e situacion **4)** Manda e raportahe **5)** BCI ta ricibi y redirigi pa instancia concerni si ta necesario.

Si bo observa cualkier di lo siguiente, lo bo por raporta esaki cu Fixi:

- Dump ilegal of hende ta deshaci di sushi ilegalmente
- Ta deshaci awa preto riba tereno publico of den dam
- Hende ta deshaci di kimico riba tereno publico
- Ta sospecha individual of compania di deshaci di kimico peligroso (venenoso) riba tereno publico, of riba tereno priva sin tin permiso.
- Wacharaca di auto riba tereno publico

Gobierno di Aruba, a traves di Ministerio di Naturalesa, ta determina pa implementa un maneho di desperdicio sostenibel y responsabel. Vigilancia y ehecucion – toezicht en handhaving – tambe ta forma parti di e strategia general. Nos ta contento di por acapara BCI cu autoridad adicional, miho ekipo, y awo tambe un aplicacion cu lo yudanan eherce nan trabou.

Download e FIXI app gratis na [www.fixi.aw](http://www.fixi.aw) of via App Store of Google Play.





## UNESCO ARUBA A CELEBRA 35 AÑA COMO MIEMBRO ASOCIA DI UNESCO

### Sra Marushka Tromp, Secretaris General di UNESCO Aruba a duna un splicacion cortico con UNESCO Aruba ta funciona

Recientemente durante un Conferencia di Prensa en conexion cu 35 aña Aruba como miembro asocia di UNESCO, sra. Marushka Tromp Secretaris General di UNESCO Aruba a duna un splicacion tocante di UNESCO Aruba y con e ta funciona. Sra. Tromp a informa cu e meta di Comision Nacional di UNESCO Aruba ta fortifica e ehecucion di e mandato di UNESCO door di informa y consentisa e comunidad di Aruba na un forma concreto y tangibel, tocante di e trabounan di UNESCO Aruba y nan importancia pa Pais Aruba.

#### AREANAN DI MANDATO DI UNESCO

E Secretaris General di UNESCO Aruba a informa tocante e areanan cu UNESCO tin un mandato riba dje, cualnan ta Educacion, Ciencia, Cultura, Comunicacion y Informacion. UNESCO su meta final ta pa sociedadnan rond mundo interconecta di tal forma pa yega na un cultura di pas. UNESCO international ta traha pa cada area a base di programa, proyecto, recomendacion pa maneho y/of convenionan. Riba cada un tereno tin varios tema cu UNESCO Aruba ta trahando conhuntamente cu stakeholder local y internacional pa nan realisacion. Algun tema ta mas avansa cu otro, algun ta mas visible y ya por a sinti nan impacto, algun di nan ta den desaroyo continuo. Sra. Tromp a subraya cu nos mester puntra nos mes kico ta loke ta conecta e temanan na otro. Kico cultura tin di haber cu clima? Con cultura ta influencia ciencia y educacion? Con deporte ta un catalisator pa pas y salud mental?

#### INSTRUMENTONAN RIBA NIVEL LOCAL

UNESCO Aruba ta funciona den practica cu specialistanan riba cada tereno pa hunto cu stakeholders realisa e temanan di cada un tereno. Cada sprecialista ta specialisa riba nan area y tambe riba e programa di UNESCO international y lo usa un approach basa riba, entre otro, investigacion, prioridad, inovacion y colaboracion intersectoral pa hunto cu cada 'stakeholder' relevante duna contenido na un tema riba nivel di



maneho, programa, proyecto y/of un combinacion. UNESCO tin un Programa di Participacion cu ta duna sosten financiero na proyectonan di NGO's den e areanan di UNESCO. Cada dos aña paisnan por entrega un maximo di siete proyecto y cu aprobacion di UNESCO Paris, e NGO ta ricibi un montante pa financia e proyecto.

#### UNESCO ARUBA

UNESCO Aruba ta consisti di un Comision Nacional pa UNESCO (NUC) y un Secretariado. NUC cu ta wordo presidi pa Minister di Cultura, sra. Xiomara Maduro, como vice-presidente sra. Annemarie Proveyer-Groot y tin sr. Peter Scholing, sra. Regine Croes y sr. Siegfried Dumfries como miembro. E Secretariado ta consisti di sra. Marushka Tromp, Secretaris General di NUC, como especialista riba e tereno di Educacion, ta sra. Nora Eleonora, como especialista riba e tereno di Cultura sra. Ruby Eckmeyer, como especialista riba e tereno di Ciencia Sr. Marck Oduber y documentalista di e Secretariado ta sra. Suhail Zaandam.

Pa mas informacion tocante UNESCO Aruba y pa e trabounan realisa door di varios 'stakeholders' por bishita nan pagina di facebook di UNESCO Aruba.





## RESUMEN DI SIMAN 42 CU VARIOS TRABOU TRAS DI LOMBA



E siman aki un biaha mas ministerio di Turismo & Salud Publico a haci varios trabou cu nos kier comparti cu e comunidad. E siman aki Sr. Dangui Oduber a reuni cu e consul general Americano sra. Margaret Bond kende ta biba na Corsow. Durante e reunion aki a atende varios topico di interes mutuo cual lo fortalece e enlace entre Aruba y Merca. Tambe a gradici Merca pa e cooperacion di gobierno Mericano especialmente pa locual ta trata e acuerdo di “pre – clearance” cu Aruba ta disfruta di dje.

Conseguentemente tambe a anuncia cu 7 dia Januari 2023 Aruba lo ricibi pa prome biaha un di e cruceronan cu ta pertence na e Yacht Collection di The Ritz Carlton, conoci bou di e nomber Evrima. Esaki ta un logro sumamente importante despues di tene hopi discussion pa hasi esaki posibel.

E acontecimentonan aki ta importante y tambe ta cuadra

cu nos vision pa cu e crecimiento di nos turismo. Parti di e strategia pa cu esaki ta pa atrae turistanan afuente kende lo genera mas entrada pa pais Aruba. Asina nos lo keda traha strategicamente pa hiba pais Aruba dilanti.





**Minister Dangui Oduber:**

# **RENOBACION DI E TRAPI NA RODGERS BEACH TA CONTINUACION DI MAS PROYECTO BUNITA PA SAN NICOLAS**


Dialuna mainta Minister di Turismo y Salud Publico sr. Dangui Oduber tabata presente na e trapi na Rodgers Beach caminda e mandatario a anuncia cu lo bay drecha e trapi cu ta situa na Rodgers Beach cu arte di mosaic. Di e forma aki ta keda haci inversionnan den e mantencion y mehoracion di e infraestructura den e area aki mescos cu tabata e caso na Rodgers Beach cu a tuma lugar exactamente 1 aña pasa, e mandatario a señala. E trapi di Rodgers Beach tawata mal estado y deterioro y pesey Minister Oduber a tuma e decision pa renoba e trapi aki invertiendo asina aki den producto Aruba. E trabounan pa renoba e trapi a wordo anuncia 20 oktober 2021 y awe nos tin un bunita trapi restaura.

E siguiente fase di e trapi cu lo ta ponemento di mosaic lo wordo financia cu fondonan di Aruba Tourism Authority (ATA). E proyecto di renobacion di e trapi caminda ta bay haci uzo di artistanan di mosaic local y internacional y lo keda bou encargo di Tito Bolivar. E proyecto aki ta den bon cooperacion cu e parke marino. Minister Oduber su vision y maneho ta pa sigui atrae turistanan di “low volume high impact”, e turistanan cu tin un entrada anual di mas di 150 mil dollar pa aña. Pesey ta hopi importante pa sigui inverti den e producto Aruba pa mantene e expectativa di ta un destinacion di calidad.

Na momento cu Minister Oduber a drenta Gobierno na 2017, Gobierno tabata tin un vision y un masterplan pa e area di Sero Colorado y tambe San Nicolas. Den esaki a inclui e proyecto di Baby Beach fase 1, 2 y 3, a inclui e renobacion di e Oficina di turismo na San Nicolas. Tambe a introduci e festival cultural di Island Fest cu lamentablemente mester a para temporalmente door di e pandemia. Awor ta percurando pa mehora henter e area di Rodgers Beach mescos ta e caso di Baby Beach.

Minister Dangui Oduber a menciona cu e construccion di hotel Secrets ta continua, tambe cu pronto e construccion di un otro boutique hotel tambe lo cuminsa. Pues tin henter un desaroyo hopi positivo pa San Nicolas caminda gobierno ta inverti y sector priva na su turno tambe ta duna di nan banda.

Minister Oduber a sigui bisa cu Gobierno ta kere cu San Nicolas tin e potencial pa bira un segundo capital turistico di Aruba. Finalmente e mandatario kier a gradici ATA pa kere den e proyecto aki y ehecuta e vision y maneho di Ministerio di Turismo, tambe DOW, DIP y Ministerio di Infraestructura pa e bon cooperacion brinda.







## MINISTER GEOFFREY WEVER TA ANUNCIA START DI PROYECTO FINANASAS DEN MI HOGAR NA PARADERA

Minister di Asuntonan Economico, Comunicacion y Desaroyo Sostenibel, Geoffrey Wever ta anuncia cu e proyecto Finansas den mi Hogar ta bai start na Paradera den luna di november. Meta di e proyecto ta pa nos hendenan ricibi guia y conocimiento cu por yuda tuma decisionan financiero cu ta beneficia su bienestar.

E Proyecto Finansas den mi Hogar a wordo desaroya door di Fundacion Plan di Bida. Fundacion Plan di Bida cu su presidente sra Paloma Osorio- Tromp tin como mision y vision trece conscientisacion den nos comunidad, ofreciendo ayudo y guia mustrand e manera pa maneha nos finansa mas efectivo.

Na Aruba 3 di 10 hogar ta gasta mas di nan entrada tur luna segun sondeo di Banco Central di Aruba. E desaroyo aki ta uno preocupante pasobra e ta indica cu cada luna ta un reto pa hogarnan cumpli cu tur necesidad y responsabilidadnan financiero manera entre gasto pa vivienda, cuminda, y prestamonan personal. Como consumidor ta importante pa sa ki impacto cada decision financiero tin riba nos cartera y nos hogar.

Hunto cu Fundacion Plan di Bida lo ofrece un curso como apoyo na nos hendenan. E curso ta consisti di 4 sesion cu lo enfoka riba con nos por maneha nos finansa cada dia. E 4 sesionan ta:

- **Sesion 1:** Mi ta efectivo den mi cas. Con mi por spaar y tambe con pa cumpra sin emocion
- **Sesion 2:** Mi ta paga mi debe. Kico

lo pasa ora mi no por paga mi debe mas

- **Sesion 3:** Mi ta inverti den mi futuro. Futuro di nos y nos yuinan ta importante y con nos por logra nos metanan
- **Sesion 4:** Mi presupuesto. Kico ta luho y prioridad y con segun bo entrada bo por presupuesta y asina logra nos metanan

Na final di e curso cada cursista lo ricibi un certificado di participacion.

Minister Geoffrey Wever ta invita cada un cu ta desea di participa pa hasi esaki pa asina haya e apoyo necesario pa un maneho di bo finansas. Registracion ta completamente gratis, pero cupo ta limita.

Pa mas informacion y registracion por tuma contacto cu Fundacion Plan di Bida via telefon 5688848 of email [finansasdenmihogar@gmail.com](mailto:finansasdenmihogar@gmail.com)

Ministerio di Asuntonan Economico,  
Comunicacion y Desaroyo Sostenibel den  
conhunto cu Fundacion Plan di Bida ta presenta:

### Finansas Den Mi Hogar

Den districtonan di Savaneta, San Nicolas, Santa Cruz,  
Paradera, Oranjestad, y Noord.

Registra via:

Email: [finansasdenmihogar@gmail.com](mailto:finansasdenmihogar@gmail.com)  
Telefon: 568-8848







## INTERPOL SU CENTRO DI ANTI-CORUPCION TA BAY ASISTI ARUBA



Sr. Rory Corcoran ta e director di e centro nobo cu Interpol a lansa na januari di e aña aki. E meta di e centro ta pa combati crimen financiero y corrupcion y ta pa provee un punto central globalmente pa duna asistencia na tur pais cu ta miembro di Interpol.

Investigacion científico cu a wordo conduci na aña 2020 ta muestra cu 99 pais tawata victima di actonan corruptivo y crimen financiero. Calculonan ta muestra cu e diferente comunidadnan a perde alrededor di 42 bilon dollar na e criminalnan aki. Aruba no tawata un excepcion y nos tambe a bira victima di esaki.

Interpol su centro di crimen financiero y anti-corrupcion ta coopera y traha hunto cu Financial Action Task Force, the Egmont Group, Unidadnan Financiero Investigativo, Cuerponan Policial y sector financiero. E combinacion aki di experticio, informacion, tecnologia y metodonan investigativo ta su forza.

Aruba su delegacion a reuni cu sr. Corcoran cu ta e director di e centro aki, y a reuni tambe cu sr. Stephen Kavanagh. Sr. Kavanagh ta responsabel pa Interpol su "Global Crime programmes" di "Cybercrime, Counter Terrorism, Organised and Emerging Crime".

Ambos a indica cu nan ta bay yuda Aruba y otro luna lo tin un reunion cu Interpol y tur departamento Hudicial pa hunto cu Interpol yega na un "roadmap" cual lo wordo ehecuta otro aña.



E centro aki lo bay enfoca riba asistencia investigativo, operacional y analitico, pero tambe asistencia di "capacity building". Minister di Husticia y Asuntonan Social Sr. Rocco Tjon a keda sumamente satisfecho cu e disponibilidad di parti di Interpol pa asisti Aruba den intentonan pa sigui combati crimen financiero y corrupcion mas fuerte.





## **PRESIDENTE DI XAVIER UNIVERSITY A HACI PRESENTACION AMPLIO DI 66 MIYON DOLLAR DI INVERSION PA NAN MEGA PROYECTO**



Minister di Enseñansa y deporte Endy Croes a reuni recientemente cu Presidente di Xavier University Mr. Ravi Bhooplapur hunto cu Dr. Arun Dibey, Chief Academic of Medicine y Frank Croes Board of Trustee den asuntunan legal y administrativo.

Xavier University ta inverti un suma di 66 miyon dollar den un facilidad Universidad ultramoderno na Hato net tras di Aruba Bank. E promer fase cu un total di 198 camber ta cla unda studiantenan por biba riba campus y prepara nan mes den entre otro medicina. Presidente Ravi a splica Minister Endy Croes, cu pa final di e aña aki tur cos ta cla pa nan incia cu e fase 2 di e proyecto aki cu ta uno hopi ambicioso y bunita. Lo traha un total di 25 klas local, un Laboratoriuim, un 'Library', un cafetaria masha grandi, un Auditoriuim ultramoderno di 580 asiento cu sonido y video ultramoderno cu propio parkeerplaats y alaves un 'Board Room' di capacidad di 50 persona maximo tambe ultramoderno. Un total di 100 container lo ta rumbo pa Aruba na "steels" for di Brasil cu un total di 980 ton na steel pa construccion di e mega proyecto aki. No solamente esaki pero



despues cu esaki keda cla den aña 2024 Xavier University tin un plan bunita cu nan edificio actual na Santa Helena.

E reunion tabata uno informativo y pa consolida e relacion entre gobierno y Xavier University cu mas plannan masha bunita pa futuro. Sigur Xavier University ta un stakeholder importante cu a hasi un inversion di 66 miyon us dollar den un proyecto masha grandi y bunita.



**Minister Endy Croes:**

# **A REUNI Y RICIBI UN PRESENTACION DI PLATAFORMA DI ENSEÑANSA Y LABOR (PEL)**



Siman pasa Minister Endy Croes a reuni cu Plataforma di Enseñansa y Labor (PEL), di parti departamento di Enseñansa sra Sheila Maduro y Dumpfries a traha un 'notitie' ariba esaki, hunto cu stakeholdersnan y representantenan di labor presente hunto a repasa e documentonan cu directie onderwijs a prepara den cuadro di 'landspakket' y palabracionnan haci pa cu e 'doorlichting rapport' pa asina Enseñansa por prepara studiantenan pa locual cu mercado laboral ta existi.

Asina aki Plataforma PEL tin cu traha hunto pa mira con e plataforma aki ta bai musta y funciona. Cu dos persona di Enseñansa y dos persona di labor y 1 persona di sector priva cu ta dunadornan di trabou, cada aña e Presidente di e Plataforma aki lo keda varia un aña ta labor y otro aña ta enseñansa y 'beroeps onderwijs'. Pa luna di November proximo ta poni pa bin hunto y formalisa e Plataforma PEL y di aki padilanti pa duna e contenido na e plataforma cual ya caba tin un proceso con esaki ta bai funciona. Y asina hunto nos logra prepara nos studiantenan bon riba nivel pa tur locual e mercado laboral ta existi.

Minister Endy Croes a termina agregando cu tabata un amplio presentacion y un bon reunion.







## PRONTO ARUBA LO BENEFICIA DI LOCUAL A LOGRA NA ECUADOR



Recientemente Minister Glenbert Croes a biaha pa Ecuador en busca di un solucion cu lo transmiti den un reduccion di awa y coriente pa nos pueblo.

E mision pa Ecuador ta pa haya e oportunidad pa cumpra HFO conforme especificacion- y exigencianan di WEB pero na un prijs mas barata. E meta aki a wordo logra cu e mandatario su bishita pa Ecuador. Ta bon si pa informa nos pueblo cu ya pa 3 aña caba como 50% di e HFO cu Aruba ta cumpra ta

di Ecuador. E otro 50% ta bin for di Colombia, Puerto Rico y Merca. Pero e compra aki tabata pasa via 2 intermediario. Pero awor Minister Glenbert Croes a logra pa di Pais pa Pais, Gobierno pa Gobierno, PetroEcuador pa RDA/FMSA, e compra ta directo pa nos pais. Esaki ya ta resulta den un descuento substancial.

Pero e biahe aki tabata exitoso y sumamente beneficioso pa Aruba pa mas di un motibo. Manera e mandatario a expresa den su rueda di prensa, el a bay Ecuador cu e mision di por haya HFO na un prijs mas barata cu lo beneficia nos pueblo, pero e biahe a duna mas resultado.

### Logronan:

1. HFO mas barata conforme especificacionnan cu RDA, WEB y ARUBA ta exige.
2. A surgi e proposicion pa Flotas Petroleras de Ecuador esta FLOPEC, uza Aruba como su hub pa su flota, pa almacena su producto den e tankinan di RDA y pa distribui esaki for di Aruba. E actividadnan aki ademas di genera entrada pa RDA/FMSA, lo genera trabou tambe.
3. PetroEcuador, ta e compania nacional di petroleo di Ecuador. E mandatario a keda sumamente impresiona pa e cantidad extraccion y produccion di petroleo cu tin na e pais aki, cual crudo por ta disponible pa e reactivacion di e refineria di Aruba den su fase di transicion pa gas y finalmente pa hidrogeno.

Proximamente un delegacion di RDA y FMSA lo biaha pa Ecuador pa caba di negocia y concretisa e logro aki. Pero e mandatario no ta perde speransa cu Merca lo aproba pa Aruba por busca petroleo directamente for di Venezuela tamb, cual lo resulta sumamente bentahoso pa nos pueblo. Finalmente ta pa esey nos ta hacie. Pa nos pueblo por haya e alivio den su cuenta di awa y coriente.



# MINISTER THIJSEN A ENTREGA PREMIO NA DISEÑADOR ARUBIANO DARWIN WINKLAAR



E diseñador di moda Arubiano Darwin Winklaar mihor conoci como Niño Divino den Bijlmer Parktheater na Amsterdam a ricibi for di man di Minister Plenipotenciario mr. Ady Thijsen e In de Spotlight Award 2022 como estimulo.

Darwin ta un diseñador di moda multi talento cu ta haci uso di storytelling, musica, baile y canto pa expresa su disposicon artistico. Ela re-introduci un genero nobo inspira pa sur ais Arubiano: Neo-folklorico.

E In de Spotlight Award 2022 a bai na Ivette Forster y a wordo



entrega pa Helen Kamperveen, ganadora di e prijs di teatro Colombina 21/22 pa e mihor encargo como actriz. Ivette Forster di origen Surnam, cu a crece na Aruba, na e momento aki ta encarga cu e organizacion di e Festivalnan Keto Koti, Kwaku y Reggae Lake. E ultimo shete aña Ivette ta programador di Black Achievement Month.

In de Spotlight Award ta un iniciativa di Vereniging Antilliaans Netwerk y e awardnan ta un diseño di e artista Arubiano Melvin Anderson.





*Feliz dialuna!*

UN PANDEMIA CU EFECTO DEVASTADOR  
PA UN ISLA CU SU PILAR ECONOMICO  
TA NOS BISHITANTENAN DI AFO.  
Y UN ISLA DETERMINA PA SALI  
AUN MAS FUERTE FOR DI E SLA DURO AKI.  
UN ISLA CU VISION PA PROGRESA.  
E VISION DI CADA UN DI NOS,  
VISION DI CREATIVIDAD Y INVERSION,  
LO TRECE OPORTUNIDADNAN GRANDI  
PA NOS Y PA NOS FUTURO GENERACIONNAN.  
E PASONAN CU AWE NOS TA TUMA,  
TA LAGA MARCANAN ATRAS  
PA NOS GENERACION HOBEN.  
ESA KI LO TA E COMPAS CU LO DIRIGI NAN  
DEN E HORIZONTE DI OPORTUNIDADNAN,  
PA CONTINUA CU UN ARUBA  
MAS SOSTENIBEL, FUERTE Y RELIENTE.



**20  
22** | AÑA DI  
INVERSION Y  
OPORTUNIDAD